

卷卅四 邠州 新平 三水 定平 寧州 安定 彭原 真寧

卷卅五 廊州 洛交 廊城 三川 襄樂 豐義

坊州 中平 宜君 丹州 宜州 雲州

卷卅六 延州 豐林 甘泉 陰山 延川 膚施

靈州 廻樂 延水 臨真 敷政

卷卅七 會州 烏蘭 鹽池 白原

夏州 朔方 寧朔 通遠 通遠

卷卅八 綏州 銀州 儒林 真鄉 振武 軍金 河

麟州 新秦 連谷 州府 谷

卷卅九 宥州 長澤 豐州 九原 永豐



太平寰宇記卷之三十四

松坡圖書館藏

關西道十

邠州

寧州

邠州

邠州

新平郡理新平縣

禹貢雍州之域古西戎之地本周公

劉所居故詩謂豳

邠字同

國公劉卒子慶節復立于

此古顓頊之墟秦併天下屬內史漢為右扶風北地安定三郡地後漢興平元年分安定之鶉觚右扶風之漆置新平郡理漆縣徐廣注漢書云新平漢之漆縣地以漆沮之水在焉縣東北有古邠亭



卽古之枸邑也歷魏晉同之晉武帝分漆縣置邠  
邑縣苻秦時改漆取郡名爲新平縣姚萇亂郡縣  
皆廢後魏大統十四年分涇州之新平縣置南豳  
州以北別有豳此爲南廢帝三年廢北豳州此遂  
去南字後周因之隋開皇三年于今州西南十里  
陳陽原上移白土縣入州城中四年又改爲新平  
縣大業二年省豳州以縣屬寧州其年又改寧州  
爲豳州三年改豳州爲北地郡以其地屬安定北  
地二郡至義寧二年割北地之新平三水二縣置  
新平郡復後漢末舊名唐武德元年改爲豳州復

西魏舊名二年分新平置永壽縣貞觀二年又分  
新平置宜祿縣開元十三年以豳字與幽相涉改  
爲邠字天寶元年改爲新平郡乾元元年復爲邠  
州至皇朝爲靜難軍節度

元領縣五

今四

新平 三水

宜祿

定平

寧州割到

一縣割出

永壽

州入乾

州境

東西二百里

南北一百里



四至八到

東至東京一千五百三十二里

東南至西京一千一百三十二里

東南至長安二百八十二里若至奉天縣一百三十里

東至坊州三百二十五里

北至靈州一百九十里

西至涇州一百九十里

西南至鳳翔府一百六十二里

東南至坊州三百一十五里

西北至涇州三百一十五里

戶

唐開元戶一萬九千四百六十一

皇朝戶主一萬四千一百一十二客五千七百八

十五

風俗

漢書云公劉處豳其人有先王遺風好稼穡務本業故豳詩言農桑衣食之本甚備焉其俗尚勇力習戰備居戎狄處勢使之然天水隴西安定頗同也

姓氏



新平郡三姓 古附異

人物

李育 習公羊春秋為同郡班固所重為尚書令 唐侯君集 三水人上將軍反伏

誅

土產

蜜 蠟 麻布 羊 馬 麀 鹿 藁豆 鐵

器 漢于漆縣置鐵官 甘草 貢翦刀 火筋

新平縣 舊十七鄉今十鄉 本漢漆縣屬右扶風建武八年隗

囂率眾攻畧陽上至漆進止未定會馬援夜至上喜問之援聚米以為山谷於上前指軍以所從入

上笑曰虜在吾目中矣遂進兵姚萇之亂郡縣不

立後魏于今縣西南置白土縣屬新平郡隋開皇

三年罷郡于今州城中置豳州四年改白土縣為

新平縣大業二年省豳州入寧州義寧二年復為

新平郡唐武德元年以新平郡又為豳州縣屬焉

五龍原原側有五泉出水因以為名 漆水按

酈道元注水經云漆水自宜祿縣界來又東過扶

風漆縣北以水經驗之即邠州所理是也漢志注

云漆水在縣西今縣西九里有白土川水東北流

白土原東陳陽原西又東北流注于涇水或恐白



土水是漢之漆水但古今異名耳今鳳翔府東北一百六十里麟遊縣東南亦有一漆水南流與杜陽水合非漢之漆水也故舉此以明之 爰得城漢書地理志云爰得縣屬安定郡後漢省即此城也 苻堅墓十六國春秋苻堅建元二十一年堅至五將山姚萇將吳忠圍堅堅眾奔散神色自若召宰人進食俄而忠至執堅以歸新平幽之萇求傳國璽于堅曰萇次膺符麻可以為惠堅瞑目叱之曰小羌乃敢陵天子豈以傳國璽授汝羌也圖緯符命何所依據五胡次序無汝羌名璽已送晉

不可得也萇乃縊堅于新平佛寺時年四十八 橐邱堡在縣西十八里東西南三面石坡峭峻高十丈北面築城高二丈唐武德二年置貞觀元年廢

三水縣 東北六十里舊十三鄉今十二鄉 漢舊縣屬安定郡以縣界

有羅川谷三泉並流為名今縣東北二十五里邠邑原上有柁邑故城即漢理所魏改三水縣為西川縣仍舊屬後魏初于今縣西二十八里置三水縣復漢舊名屬新平郡大統十四年移縣于今邠州西北十五里白馬堡隋開皇三年移理于今邠



州三里新平故郡城大業元年自故郡城移于今  
理唐武德元年以新平郡爲幽州三水縣屬焉元  
和十二年移縣于隴堡下舊城初大厯中吐蕃焚  
縣城又移堡上後人民不便爲邠帥郭釗所請復  
移下之 三水出寧州羅川谷有三水並經郡界  
馬嶺山俗名箭筈嶺抵慶州界有馬嶺水出焉  
翟道山一名子午山 華池女郎山並在郡邑  
洛源洛水源出女郎山 石門山王褒雲陽宮  
記東北有石門山岡巒糾紛千霄秀出有石巖容  
數百人甘泉賦云封巒石關池音靡摩序連屬 枸

邑故城在縣東二十五里卽漢枸邑屬右扶風有  
幽鄉應劭注曰左傳畢原豐郇文之昭也郇侯賈  
伯伐晉是也漢爲縣 古幽城地在縣西南三十  
里有古幽城在隴川水西蓋古公劉之邑卽此城  
也國都城記幽國者后稷之曾孫曰公劉始都焉  
幽國名也與故枸邑城相去約五十餘里漢志注  
云幽鄉是也

宜祿縣

西八十里  
依舊八鄉

本漢鶉觚縣也周地圖記云後魏

孝明熙平二年析鶉觚縣置東陰盤縣廢帝元年  
以縣南臨宜祿川又改爲宜祿縣屬趙平郡隸涇



州 鶉觚原一名淺水原 宜祿川水一名芮水  
西自涇州鶉觚縣界流入周禮職方氏雍州其川  
涇汭水經注云汭水又東經宜祿縣俗謂之宜祿  
川水 芹川水經注云出羅川縣子午山一名子  
午嶺東流經宜祿縣北過卽此水也 廢鶉觚縣  
在縣西四十里按周地圖記鶉觚縣者秦使太子  
扶蘇及蒙恬築長城見此原原高水淺因欲築城  
遂以觚爵奠祭乃有鶉鳥飛升觚上以爲靈異因  
以名縣漢書地理志云後漢永建四年屬涼州石  
勒改爲趙平郡建武十年涇州東南置趙平郡此

縣遂廢

廢陰盤縣□□按漢書武帝元鼎元年

立陰盤縣屬涼州靈帝末徙于新豐其縣遂廢

折墉城唐武德元年薛舉寇涇州屯兵于新安縣

折墉城太宗親征相守六十餘日會舉死其子仁

杲統其眾并羌胡十餘萬來挑戰上遣總管龐玉

自淺水原南出賊之右因高而陣上率大兵自原

北出其不意斬首萬餘級賊大潰仁杲懼而請降

俘其精兵萬餘人男女五萬口故城猶在今縣北

五里 長武城在縣西五十里隋開皇中築在涇

河南岸唐武德初廢大厓初郭子儀置兵以備西



戎 廢淺水縣在縣北五里後魏大統十四年廢

定平縣 北六十里舊四鄉今六鄉 本漢泥陽之地後漢不改又為

獨樂縣今縣東北三十里獨樂故城是也後魏及

周並為安定郡隋大業十年于此築城置棗社驛

唐武德二年于驛城分置定平縣仍移于今所唐

末喪亂曾為衍州周世宗顯德五年廢為定平縣

隸邠州尋屬寧州皇朝又隸邠州 五柞亭續漢

書云泥陽縣有五柞亭是也

### 寧州

寧州 彭原郡今理定安縣 禹貢雍州之域古西戎地公劉邑也

周時為義渠戎國史記匈奴傳云夏道衰而公劉

失其稷官竄于西戎邑于邠至秦穆得由余西戎

八國服于秦岐梁山涇漆之地有義渠大荔烏氏

胸衍之戎在此地其後義渠之戎築城以自守而

秦稍蠶食至于惠王拔義渠二十五城秦昭王時

殺義渠戎王于甘泉遂起兵伐殘義渠于是秦有

隴西北地上郡築長城以備胡秦本紀惠文君十

一年縣義渠暨秦并天下是為北地郡漢為泥陽

縣之地亦為北地上郡二郡之地後漢兼屬安定

按顧野王輿地志云漢末北地郡但有泥陽富平



二縣魏晉亦然西晉愍帝時陷入劉聰郡縣之名所不詳悉按後魏書地形志云皇興二年于今州郭置華州至太和十一年改爲班州以班師振旅取其郡名十四年改爲邠州二十年改邠爲豳取古地名也至廢帝三年改邠爲寧以安寧取稱也後周分置趙興郡隋初如之至煬帝又改爲豳州尋廢豳州改趙興郡爲北地郡義寧元年領定安羅川襄樂彭原新平三水六縣二年分定安置歸義縣以新平三水屬新平郡唐武德元年改北地郡爲寧州其年以彭原縣屬彭州三年分彭原置年復爲寧州

元領縣六 今五

定安 彭原 貞寧 襄樂 彭陽

一縣割出

定平州入邠州

州境

東西二百一十六里 南北一百五十四里



四至八到

東南至東京一千八百里

東南至西京一千三百一十四里

東南至長安四百五十三里

東至坊州三百二十五里

南至邠州一百四十二里

西至涇州一百七十三里

北至慶州一百二十七里

東南至坊州三百三十里

西南至涇州一百八十里

西北至涇州臨涇縣二百三十三里

東北至鄜州直羅縣三百八十九里

戶

唐開元戶三萬二百二十八

皇朝戶主一萬一千一百四十八客六千八百三

十三

風俗同邠州

人物無

土產

亦同邠州尤有草荳蔻 白蜜 防風充貢



定安縣舊九鄉今八鄉本漢泥陽縣地後漢爲富平縣後魏

太武眞君二年置定安縣在今縣理西北三里隋

開皇三年移于今理仍舊屬寧州扶蘇冢秦太

子冢在嵩城原洛水按水經注云一名馬嶺川

水酈道元注水經云洛水又南經栒邑故城北與

栒陽合珊瑚谷水水經注云珊瑚水東南至栒

邑入洛九陵水在慶州華池縣界子午山川中

有九堆似陵故謂之九陵水函寧在郡西班牙

皮賦云至於函寧

彭原縣西北一百里舊二鄉今五鄉本漢彭陽縣地後漢又爲富

平縣地後魏破赫連定後于此復爲富平縣廢帝

改爲彭陽縣屬西北地郡隋開皇三年罷郡以縣

屬寧州十八年改爲彭原縣因彭池爲名源在郡

西富平故城後漢富平縣今廢天固堡隋置

在縣南甚險固

眞寧縣東南八十里元四鄉本漢陽周縣地屬上郡陳餘與章

邯書曰蒙恬爲秦將北逐戎人開榆中地數千里

竟斬陽周謂此縣也後魏置泥陽惠陟二護軍季

文復置陽周縣隋改爲羅川縣因縣南羅水爲名

屬寧州天寶元年改爲眞寧縣橋山一名子午



山在縣東八十里 黃帝冢在橋山上漢志上郡  
陽周縣橋山有黃帝冢皇覽冢墓記黃帝葬橋山  
史記漢武北巡朔方勒兵十餘萬還祭黃帝于橋  
山上曰吾聞黃帝不死今有冢何也或對曰黃帝  
已仙上天羣臣葬其衣冠于此 羅川水自彭原  
縣界流入又曰羅山水出羅山 大陵水水經注  
云大陵小陵水出巡和南殊川西南經寧陽城故  
幽詩曰夾其皇澗陵水卽皇澗也 通聖觀唐開  
元二十三年八月玄宗夢羣仙現于羅底乃詔訪  
于彭原羅川縣東王褒村底家莊有一老人引使

者至洞口見一白兔入穴遂掘得二十七仙並玉  
石之象各題名姓得道去處并老人亦一仙之數  
以應二十八宿仍于本縣置觀曰通聖別塑眞容  
改縣曰眞寧 要冊湫皇朝太平興國二年封眞  
寧縣界要冊湫普濟王爲顯聖王

襄樂縣

東八十里舊二鄉今四鄉

漢襄洛縣地屬上郡後魏孝文

改洛爲樂縣城本後魏燕州城也周地圖記云文  
帝大統十六年置燕州因築此城後周屬北地郡  
隋廢郡而縣屬寧州 大延水水經注云大延小  
延水出油水南延溪西南流經襄樂縣南于延城



西二水合流 油水水經注云油水與追語川水  
並出東翟道山亦襄樂界

彭陽縣

西八十里舊二鄉今三鄉

本漢彭陽縣地後魏于縣理置

雲州周武帝保定二年廢州爲防隋文帝廢防爲  
豐義城唐武德二年分彭原縣爲豐義縣屬彭州  
貞觀元年廢州以縣屬寧州其城卽後魏雲州城  
也開元八年四月割隸涇州尋復屬寧州皇朝開  
寶九年改爲彭陽縣

太平寰宇記卷之三十四終

太平寰宇記卷之三十五

關西道十一

鄜州

坊州

丹州

鄜州

鄜州

洛交郡今理洛交縣

禹貢雍州之域春秋時白翟國秦始

皇時地屬上郡漢爲上郡雕陰之地暨晉陷於戎  
羯不置州郡於今坊州中部界置杏城鎮後魏太  
和十五年改鎮爲東秦州孝明二年又改爲北華  
州廢帝二年改爲鄜州因秦文公夢黃蛇自天下  
屬地遂于鄜衍立鄜時爲名隋大業三年罷州置



鄜城郡其年自杏城移理于五交城卽今州理唐武德元年改爲鄜州領洛交洛川三川伏陸內部鄜城六縣二年以內部鄜城隸坊州三年置直羅縣貞觀二年置都督府六年爲大都督府九年復爲都督府天寶元年改爲洛交郡乾元元年復爲鄜州皇朝爲保大軍節度使

元領縣六 今五

洛交 洛川 三川 直羅 鄜城坊州割到

一縣割出

甘泉入延州

州境

東西二百六十七里 南北一百七十三里

四至八到

東南至東京一千二百里

東南至西京九百八十里

東南至長安五百里

東至慈州一百里

南至坊州一百四十五里

西至慶州三百九十里

北至延州一百五十里



東南至同州二百五十里

西南至寧州一百五十九里

西北至蕃部一百八十里

東北至丹州一百一十里

戶

唐開元戶三萬一百八十五

皇朝戶主八千九百一客一萬二千九百六十八

風俗

秦塞要險地連京師漢時匈奴頻入朔方故塞外烽火照甘泉即今渭北九峻山是也白翟故地俗

與羌渾雜居撫之則懷安擾之則易動自古然也

人物無

土產

龍鬚席貢

賦麻布

大黃

出直羅縣今貢

洛交縣

元三鄉

本漢雕陰縣地屬上郡雕山在西南故

曰雕陰魏省上郡晉為戎狄所居苻堅時為長城

後魏及周為三川縣隋文帝分三川洛川縣以置

此額取洛水之交故曰洛交屬鄜州 秦長城在

縣東南四十里因河為塞史記云秦將蒙恬所畫

漢武廟在仙宮城在今相思川是也 杏城漢



將韓胡伐杏木爲柵以抗北狄 朝那膚施漢書  
云匈奴南侵至朝那膚施謂此地也 雕山縣在  
山陰故云雕陰 洛交水在縣南一里洛水交會  
之所 大塞門川水在縣西北四里 小塞門川  
水在縣西北一十五里 白水按水經注云白水  
源出分水嶺 僞夏太后城在縣南三十六里赫  
連勃勃聞劉裕滅姚泓令其子義真等守自將兵  
入長安畱太后於此築城以居之

洛川縣

東六十里舊三鄉今四鄉

本漢鄜縣地後秦姚萇置縣因

洛川水以立名後魏置敷城郡隋開皇三年罷郡

以縣屬鄜州自高槐移于今所 蒲川水水經注

云蒲川水東南流入坊州

三川縣

西南六十里舊五鄉今三鄉

本漢翟道縣地按翟道縣在

今坊州中部縣古城是也地理志翟道屬左馮翊  
苻秦於縣南長城原置長城縣屬長城郡後魏廢  
帝三年改爲三川取古三川郡爲名屬中部郡隋  
開皇三年隸鄜州 三川水謂華池水黑水洛水  
同會謂之三川水古爲三川郡也 葦谷水水經  
注自葦谷東南流入三川 黃原水水經注云破  
羅谷水南流經黃原祠東合葦川是也



直羅縣

西南九十里舊一鄉今三鄉

本漢雕陰縣地魏省雕陰縣

晉時戎狄所居後魏置三川縣隋使戶部尙書崔仲芳築城以居之城枕羅原其川平直故曰直羅城唐武德三年分三川洛交于此置縣因城爲名

羅川在縣南二里

鄜城縣

東一百二十里舊八鄉今三鄉

本漢鄜縣地屬左馮翊後漢

省後魏于今縣理置敷城縣屬敷城郡隋大業元年改敷爲鄜屬鄜州唐武德二年改屬坊州唐末李茂貞建爲翟州梁開平三年改爲禧州又改其縣爲昭化縣後唐同光元年復爲鄜城縣依舊隸

鄜州

楊班祠周地圖記姚萇時立節將軍楊班

居黃梁谷北其谷西有小谷由來無水夜中忽有人語就班借牛車十具云欲移徙我是湫神尋則聲絕班卽備牛車十具置門前至明車濕牛汗乃尋車轍至乾谷忽有水方二百餘步其水極深不可測冬亦湛然每水旱祈禱有應今按楊班湫水周一里餘二十步

坊州

坊州

中部郡今理中部縣

禹貢雍州之域古白翟之國秦屬內

史漢書云朔方爲西部都尉休屠爲北部都尉渠



搜爲中部都尉故此爲中部郡馬又郡國志云鄜城本三秦高奴之地翟道故城是也俗謂高樓城卽春秋白翟所居魏晉陷于狄不置郡縣劉石苻姚時於今州理西七里置杏城鎮常以重兵守之後魏文帝改鎮爲東秦州孝明改爲北華州廢帝改爲鄜州後周天和七年世祖元皇帝作牧鄜州于今州界置馬坊結構之處尙存唐武德二年高祖駕幸于此聖情永感因置坊州取馬坊爲名天寶元年改爲中部郡乾元元年復爲坊州

元領縣四

今三

中部 宜君 昇平

一縣割出

鄜城州入鄜州

州境

東西二百里 南北一百四十五里

四至八到

東至東京一千四百三十里

東至西京八百九十里

南至長安三百六十里

東至丹州二百六十里



西至靈州三百二十五里

北至鄜州一百四十五里

東南至同州二百七十五里

西南至邠州三百一十五里

西北至慶州三百八里

東北至丹州二百六十里

戶

唐開元戶一萬五千七百一十五

皇朝戶主四千七十五客八千八十

風俗

白翟故俗與羌渾雜居撫之則懷安擾之則易動

自古而然

人物無

土產

龍鬚席貢弓弦麻

中部縣舊四鄉今八鄉本漢翟道縣地屬左馮翊漢書渠搜

中部都尉理所魏晉戎翟所居後秦姚興於今理

南十八里置中部郡後魏太武帝改為中部縣文

帝大統九年縣移理杏城後兼立郡隋開皇九年

避廟諱改為內部大業三年罷鄜州為上郡縣自



杏城移于今理仍屬上郡武德二年復于此立州  
洛水在州東四十里按山海經云出白於山地  
理志云洛水出北地歸德縣北蠻夷中從鄜州洛  
川縣西南入中部鄜城二縣過入同州白水縣  
沮水自昇平縣北子午嶺出俗號子午水禹貢云  
漆沮二水出馮翊北卽子午水下合榆谷慈烏等  
川遂爲漆沮水 石堂山水經注云豬水西出翟  
道縣西石堂山本名翟道山又穆天子傳癸酉天  
子命駕八駿之駟造父爲御南征朔野逕絕翟道  
升于太行翟道卽縣之西石堂山也郭璞以爲隴

西狄道非也 淺石川水經云淺石川出翟道山  
香川水水經注云香川水源出中部縣北香水  
在縣西南三十七里自宜君縣界來南香水在縣  
南三十五里源出遺谷 泥水水經注云泥水出  
翟道縣泥谷今按圖經泥谷水在縣西北五十里  
源自栲栳谷來 蒲水水經注云蒲谷水源出中  
部縣蒲谷 橋山按山海經云其山下水流通故  
曰橋山又史記云黃帝葬于其山今陵冢尙在大  
厯七年置廟開寶二年勅修廟祭祀在州西二里  
故杏城在縣西五里漢將軍韓胡伐杏木爲柵



以抗北狄爲名 杏城鎮姚萇置在今郡東七里  
赤沙城在縣西七十里古戍城也 翟道故城

在縣西北四十里故城是也周三里纔有餘址後  
漢省宇文周曾於此城置利人縣尋廢

宜君縣 西南一百里舊三鄉今六鄉 按縣卽中部之地前秦苻堅

於祓祢古城北置宜君護軍後魏眞君七年改爲

宜君縣大統五年又移于今華原縣北爲理唐貞

觀十七年廢地入雍州二十年於此置玉華宮仍

於宮南四里置宜君縣永徽二年縣與宮俱廢龍

朔三年坊州刺史竇師倫奏再置宜君縣卽今理

也 廢玉華宮在縣西四十里唐貞觀十七年於

宜君縣鳳凰谷置正殿覆瓦餘皆葺茅其地本縣

人秦小龍宅太宗曰小龍出大龍入當時以爲清

涼勝於九成宮永徽二年有詔廢宮爲寺便以玉

華爲名寺內有肅成殿玄奘法師於此院譯經每

言此寺間浮之兜率天也 慈烏水在縣西北四

十里源自昇平縣分水嶺東流入當縣界 石盤

水在縣東五十里源自耀州同官縣大石盤出東

流入縣界

昇平縣 西九十里舊三鄉今四鄉 唐天寶十二年刺史羅希奭奏



析宜君西北界昇平鄉等三鄉以置之以鄉爲名  
東南去宜君縣三十五里尋以吐蕃侵破移縣在  
橫棒川 子午水在縣北一百里出子午嶺東南  
流入中部縣合沮水

### 丹州

丹州 咸寧郡今理宜川縣 禹貢雍州之域春秋時爲白翟所居  
秦屬上郡漢因之魏文帝省上郡晉時戎狄所居  
苻姚時爲三堡鎮後魏大統三年割鄜延二州地  
置汾州理三堡鎮廢帝以河東汾州同名改爲丹  
州因丹陽川爲名領義川樂川郡隋大業三年廢

丹州于義川縣置延安郡十三年爲胡賊劉步祿  
所據義寧元年于義川縣置丹陽郡唐武德元年  
改爲丹州領縣五二年于州置總管府管北連北  
廣二州貞觀元年罷府爲州永徽二年移于赤石  
川天寶元年改爲咸寧郡乾元元年復爲丹州

元領縣五

今三

宜川 雲巖 汾川

一縣割出

門山 入延州

一縣廢



咸寧 併入宜川

州境

東西一百九十五里 南北九十里

四至八到

東至東京一千三百五十里

東至西京九百二十里

西南至長安五百五十里

東至慈州界黃河岸八十里自黃河岸東至慈州

六十五里

南至同州三百二十里

西至鄜州一百八十三里

北至綏州三百八里

東南至同州韓城縣界一百三十五里

西南至坊州二百六十里

西北至延州二百一十二里

東北至隰州四百三十里

戶

唐開元戶一萬三千四百二十二

皇朝戶主四千一百四十六客二千六百三十八

風俗



隋圖經雜記俗謂丹州白室胡頭漢舌卽言其狀似胡而語習中夏白室卽白翟語訛耳近代謂之部落稽胡自言白翟後也

人物無

土產

龍鬚席 蠟燭 香子 苦參已上貢 麝香

宜川縣

舊四鄉今五鄉

本秦上郡之地二漢因之魏省上郡

至晉爲戎狄所居後魏文帝大統三年置義川縣屬義川郡因川爲名大業三年廢丹州義川縣屬延安郡義寧元年于舊城復置丹州縣在城內永

徽中隨州移于今理皇朝開寶九年改爲宜川縣

鳳翅山在縣南形象鳳翅縣廨宇在其上 公

字山在縣西北三里山形象公字 丹陽川在縣

西南水經云蒲川水自鄜州洛川縣流入丹陽川

赤水川在縣西北二里闊三百步從西延州臨

眞縣界入 庫碣川在縣西北二十里從雲巖縣

界入合丹陽川按圖經云川南是漢川北是胡胡

漢之人於川內其結香火故喚香火爲庫碣因此

爲名又名小庫碣川 古丹州城在縣東北二十

九里永徽二年移于丹陽赤石川口其城遂廢



廢咸寧城在州東四十五里一鄉本秦上郡地後  
魏太和十八年於縣南白水川置永寧縣屬義川  
郡至大統十三年改爲太平縣隋開皇三年罷義  
川郡以縣屬丹州十八年改太平爲咸寧縣以界  
內鎮爲名仍舊屬皇朝太平興國九年併入宜川  
雲巖縣西北七十三里元三鄉後魏大統二年於今縣西薛河  
川置永平縣屬義川郡十三年改永平爲雲巖縣  
蓋因邑界雲巖山以爲名大統九年大水漂蕩移  
于桑樞原隋開皇三年移就廢樂川縣大業二年  
隸入義川縣唐武德元年復置於迴城堡又逢陰

雨汲水不通咸亨四年移居庫利川復爲河水衝  
注皇朝開寶三年移于東南一百步今理所石  
閣山在縣東北三十五里丹延兩界山形似樓閣  
雲巖山在縣東十里山巖重疊如雲 庫利川  
在縣西從西延州臨真縣界入當縣土諺云昔有  
奴賊居此川內稽胡呼奴爲庫利因此爲川名  
渭牙川在縣北二十五里從西延州延長縣界來  
五十里卻入延州門山縣川內有水木稽胡喚水  
木爲渭牙因以爲名 廢可野寺在縣北十五里  
古老相傳劉薩河坐禪處稽胡呼堡爲可野四面



太平寰宇記 卷之三十五  
懸絕唯有北面一路可通人馬

汾川縣

東北七十里舊七鄉今三鄉

本漢上郡地魏太和八年置

安平縣縣在薛河川屬北汾州其州在河西三堡鎮東更有南汾州魏大統十八年省北汾州乃取丹陽川號立汾川縣初理高樹山南善多村周保定二年移就庫利川北甚寒原隋大業十年胡賊郝仁朗攻陷又移于土壁堡唐開元二十二年移於甘泉坊今理所是也 狗嶺水經注云汾川縣西有殺狗嶺 安樂山在縣南十里古老傳云昔屯兵於此因名安樂 黃河在縣東北四十五里

從北延州門山縣來經縣界七十里南流入鄜州鄜城縣河岸頓狹狀似槽形鄉人呼爲石槽蓋禹理水鑿石導流之處 孟門山在縣東南二十里

太平寰宇記卷之三十五終

太平寰宇記

卷之三十五

古



太平寰宇記卷之三十六

關西道十二

延州

靈州

延州

延州

延安郡今理膚施縣

禹貢雍州之域春秋時白翟所居秦

屬上郡漢為上郡高奴縣之地今州理即上郡高

奴縣之域項羽三分秦地以董翳為翟王都高奴

即其地也魏省上郡至晉陷於戎翟其後屬赫連

勃勃後魏滅赫連昌以為統萬鎮孝武置金明郡

宣武帝置東夏州廢帝以為延州以界內延水為



名置總管管丹延綏三州隋開皇八年廢總管但  
為延州煬帝以為延安郡唐武德元年改為延州  
總管府領膚施豐林延川三縣管南平北武東夏  
三州四年又管丹廣達三州貞觀元年罷都督府  
開元二年復置都督府領丹綏渾等州天寶元年  
改為延安郡乾元元年復為延州至皇朝為彰武  
軍節度

元領縣十

膚施 延長 延水 門山 臨真 敷政 豐

林 甘泉 鄜州割到 金明 延川

州境

東西三百六十四里 南北二百六十一里  
四至八到

東南至東京一千五百三十里

東南至西京一千一百三十里

西南至長安九百里

東至隰州三百九十里

南至鄜州一百五十里

西至慶州四百五十里

北至夏州三百八十里



東至慈州二百九十四里  
西南到鄜州一百三十里  
西北至夏州長澤縣一百七十里  
東南到綏州三百三十里  
東北至隰州黃河界二百二十里自黃河至隰州  
一百四十里

戶

唐開元戶一萬六千三百四十五  
皇朝戶主一萬二千一百一十九客四千二百七十二

風俗 畧同鄜州

人物 無

土產

尤出麝香 黃蠟 貢 秦芫

膚施縣 元二鄉 本秦舊縣屬上郡趙武靈王滅中山遷

其人於膚施漢書匈奴南侵至朝那膚施卽其處也魏晉陷戎狄隋大業三年分豐林金明二縣於此置膚施縣 五龍山有帝原水出焉有黃帝五龍祠四所在山上地志亦謂之仙人神泉祠 龍尾水出郡北龍尾溪故名龍尾水 清水水經注



太平寰宇記卷之三十六  
云清水出上郡北流至老人谷俗謂老人谷水又  
東經高奴縣合豐水 伏龍山在縣西北五里南  
北一帶按山形似臥龍是上郡之名山 濯筋川  
水在縣北二十九里自金明縣南流入縣界至州  
城一十五里入豐林縣界耆老云昔日尸毘王割  
身救鴿身肉並盡於此水中濯其筋骨因此爲名  
延長縣東一百二十里依舊二鄉本秦膚施縣地後魏廢帝元年  
於邛頭原置廣安縣隋開皇二年移於譚信原以  
廣字犯太子名改爲延安唐武德五年移就濯筋  
川西南廣德二年改爲延長天成三年遭大水移

就舊縣北一百步靠坡置 髑髏山神廟在縣東

六十里耆老相傳古時戰鬪相殺收入人首數千  
萬於此山因置神廟 獨戰山在縣北四十五里  
言山高險峻一人獨戰可以當千

延水縣東北一百一十五里元七鄉本秦臨河縣地秦滅六國使

蒙恬將兵十萬擊匈奴悉收河南地因河爲塞築  
四十四縣城臨河徙謫戍以充之漢因之在今縣  
理北十五里臨河故城是也後魏於其中置安民  
縣并安民鎮屬東夏州隋文帝廢鎮置安民戍唐  
武德二年重置安民縣屬延州貞觀二十三年改



為弘風神龍元年更為延水縣取吐延水為名今在舊縣西骨胡川 骨胡川自綏州綏德縣界四十里合黃河古老云胡名骨胡川漢名乾川今無水 盟津黃河在縣東八里按禹貢云導河積石至於龍門山海經云河出崑崙其水從綏州綏德縣界南流入縣界 五龍泉在縣東一里平石縫中湧出有雄吼之聲其水甘美可濟一方上有五龍堂故曰五龍泉

門山縣

東二百四十里元三鄉

漢定陽縣地周宣帝大象元年

分汾川雲巖二縣於本縣南六里置門山縣縣北

有山其形如門因以為名唐武德八年移于宋斯堡不通人馬總章二年移于原上廣德二年割屬延州 重覆山在縣東二十七里山形重疊因以為名 黃河在縣東三十五里北自延長縣界過入丹州 渭牙川在縣西三十里自延長雲巖兩縣界來七十五里卻入黃河

臨真縣

東南一百三十里依舊四鄉

本漢高奴縣地後魏太武置

臨真縣屬偏城郡周武天和元年稽胡叛攻破城遂移于流川隋大業十二年賊張諲攻破又移就曷雞城權住義寧元年稽胡首領歸國武德三年



郡廢縣隸延州從曷雞城移就流川舊處卽今理所  
庫利川在縣北一十五里按曷雞川耆老云  
土地沃壤五穀豐饒胡稱貯舊穀爲庫利 黑城  
在縣東二十五里庫利東流川交口赫連勃勃置  
大象二年于此置郡其城緣山坡崎嶇不正遂名  
黑城

敷政縣

西一百二十里依舊六鄉

本漢高奴縣地後魏太和初置

因城縣隋開皇六年於其中置金城鎮唐武德二  
年移縣就鎮因改爲金城縣天寶元年改爲敷政  
縣 三塹山在縣北一里其山土石相雜上有三

豕遙望如塹物因以爲名 洛河在縣西七十里  
穿蕃部來至城下 金蹄犢子殿在縣西三里有  
古城昔有犢子出于石縫中金蹄銀角化見坡犁  
王立此城廟今毀

豐林縣

東南二十里舊四鄉今二鄉

亦高奴之地晉立爲臨河縣

尋廢後魏太和元年置廣武縣後周大象元年移  
于今所改爲豐林縣隋末廢唐武德二年復置  
青化水在縣東北四十五里出自嘉泉東流入濯  
筋河嘉泉者耆老云水湧出飛流一丈似團碾可  
嘉因以名之 烏耶谷水在縣東北出本界南流



入濯筋水

甘泉縣

南七十一里元二鄉

一本漢雕陰縣地晉爲狄所居其地

有阿伏斤谷水源隱伏于川陸故名伏陸唐武德元年分洛交縣于此置伏陸縣屬鄜州天寶元年改爲甘泉縣以其泉甘美爲名 伏陸山在縣理東北 故雕陰縣在今縣南四十一里 雕陰山在縣南二十里山夾土石鷹雕之所居在洛水西二百步 甘泉在縣南巖谷上其泉去地一丈飛流激下其味甘美隋煬遊此飲之取入內又泉側有奇鳥一隻身胷項白足赤尾如小山鵲上黑下

白其聲數種

洛水在縣西源出慶州洛源縣漢

書地理志云洛水出北蠻夷中又按洛源縣則漢歸德縣 阿伏斤水川在縣南二十九里源出大

盤山東南姚嶮谷流入洛水阿伏斤者夷虜名也

金明縣

北五十里舊四鄉今三鄉

亦漢高奴之地楚漢之際董翳

所都後魏太武十二年于此置廣洛縣以界有清水所經故立廣洛爲名耳隋仁壽元年改爲金明縣避煬帝名也大業十二年省入膚施縣唐武德六年又分置金明縣 金明川川自縣北蕃部來一十五里縣西過南流入膚施縣界 渾州川水



在縣西二十里自閤門府來至縣西前合濯筋水  
延川縣東南一百七十里舊二鄉本臨河縣地後漢省後魏分安  
民縣于此置文安縣以稽胡未消取文德以來之  
之義隋開皇十八年改爲延川縣取界內吐延川  
爲名大業十二年改爲文州唐武德二年以廢城  
南有哥基川遂置基州哥基者胡語云濯筋川是  
也五年改爲北基州貞觀八年廢屬延州爲延川  
縣青眉山在縣西北六十里耆老云後魏有吐  
蕃青眉家族居此吐延水在縣北自綏州綏德  
縣及蕃界來

### 靈州

靈州

靈武郡今理迴樂縣

禹貢雍州之域春秋及戰國屬秦及

秦并天下爲北地郡漢卽富平縣之地後漢永初  
五年西羌大擾詔令郡人移理池陽至順帝永建  
四年歸舊土後魏太武帝平赫連昌後置薄骨律  
鎮在河渚上舊赫連果城也孝昌二年置靈州按  
括地志云薄骨律鎮城以在河渚之中隨水上下  
未嘗陷沒故曰靈州初在河北胡城大統六年於  
果園復築城以爲州卽今之州城是也按陸恭之  
風土記云朔方故城太和十年改爲沃野鎮至後



周又置普樂郡隋開皇初郡廢煬帝又置靈武郡  
唐武德元年改爲靈州總管府領迴樂弘靜懷遠  
靈武鳴沙五縣二年以鳴沙縣屬西會州貞觀四  
年於迴樂縣界置迴環二州並屬靈武都督府十  
三年廢迴環二州靈州都督入靈墳二州二十年  
鐵勒歸附於州界置皋蘭高麗祁連三州並屬靈  
州都督府永徽元年廢皋蘭等三州調露元年又  
置魯麗塞舍依契等六州總爲六胡州開元初廢  
復置東皋蘭燕然燕山雞田雞鹿燭龍等六州並  
寄靈州界屬靈州都督府開元二十一年於邊境

置節度以遏四夷靈州常爲朔方節度使理所天  
寶元年改爲靈武郡至德元年肅宗於靈武卽位  
升爲大都督府乾元元年復爲靈州皇朝爲朔方  
軍節度

元領縣六

今一

迴樂

五縣廢

懷遠

靈武

弘靜

溫池

鳴沙

今領鎮七管蕃戶

清遠

昌化

保安

保靜

臨河

懷遠

定



遠

州境

東西五百八十里

南北八十里

四至八到

東南至東京二千五百三十里

東南至西京二千一百一十里

東南至長安一千二百五十里

東至鹽州三百里

南至寧州五百里

西南至涼州九百里

北至磧南彌娥川水二千里

東南至慶州六百四十里

東北至豐州九百三十七里

西南至豐安一百八十里

戶

唐天寶元年戶一萬一千四百五十六

皇朝戶二千六百六十一蕃漢相雜

風俗

本雜羌戎之俗後周宣政二年破陳將吳明徹遷其人於靈州其江左之人尚禮好學習俗相化因



謂之塞北江南

人物

傅昭

靈州人晉司隸校尉咸七世孫昭博覽古文世稱學府

土產

甘草 青蟲子 鹿皮 紅花 烏翎 雜筋

野馬皮貢 鹿角膠 麝香 代赭 白鶻羽

花菘蓉 野猪黃

迴樂縣

舊十二鄉今十鄉

本漢富平縣地屬北地郡在今縣

理西南富平故城是也後周置迴樂縣城枕黃河

後魏刁雍為薄骨律鎮將上表請開富平西三十

里艾山舊渠通河水溉公私田四萬餘頃人獲其

利孝文太和七年雍又上表論漕運曰奉詔高平

安定統萬高平今澤州安定今涇州統萬今夏州及臣所守四鎮出

車五千乘運屯穀五十萬斛付沃野鎮以供軍糧

臣鎮去沃野鎮八百里道多深沙輕車往來猶以

為難設令載穀不過二十石每涉深沙必致滯陷

又穀在河西轉運至沃野越渡大河計車五千乘

運十萬斛百餘日乃得一返大廢生民耕墾之業

車牛艱阻難可全致一歲不過二運五十萬斛乃

經三年臣聞鄭白渠遠引淮海之粟泝流數千里



周年乃得一至猶稱國有儲糧民用安樂今求於

牽屯山河之水次

在今原州高平縣卽今并頭山并頭語訛亦曰沂屯山

造

船二百艘二船爲一舫一船勝二千斛一舫十人計須千人臣鎮內之兵率皆習水一運二十萬斛方舟順水五日而至自沃野牽上十日還到合六十日得一返從三月至九月三返運送六十萬斛計用人功輕於車運十倍有餘不費牛力又不廢田世祖善之詔曰非但一運自可永以爲式薄骨律渠在縣南六十里漑田一千餘頃長樂山舊名達樂山亦曰鐸落泉山以山下有鐸落泉水

故名舊吐谷渾部落所居今吐蕃置兵以守之

大石山水經注云河水至此兩山相對水出其間

卽上河峽也俗號青山黃河酈道元注水經云

其間卽上河峽也世謂爲青山峽是此白草水

在縣西南源出平地富平故城漢爲縣故城在

今縣西南溫泉鹽池在縣南四十里周迴三十

一里出鹽渾懷鄯水經注云河水東北經渾懷

鄯果州水經注云河水北有薄骨律鎮城在河

渚上舊赫連果城也桑果榆林列植其上故謂之

果州鳴沙西枕黃河人馬行沙有聲異於餘沙



故曰鳴沙因爲縣卽今威州城是其地也 白馬  
騮城十六國春秋云赫連勃勃時有駿馬死卽取  
毛色爲號故名其城爲白馬騮 泰山在河之東  
北連互彌遠 警山時有警急卽山先有大響  
隱山多有雲霧隱多見少故以爲名 石樓山山  
形似樓因以樓名 如意泉以供給人馬如意充  
足故以爲名 艾山渠後魏刁雍爲薄骨律鎮將  
重開石渠通河漑田四萬頃人今賴之 淶蓮池  
赫連勃勃每畋于三交淶蓮池 青鹽澤按漢書  
云朔方縣青鹽澤在其南 千金坡 漢富平津

甘泉 靈泉

廢懷遠縣

北一百二十里三鄉

本漢富平縣地周建德三年

遷二萬戶於此置郡及縣並名懷遠隋開皇三年  
罷郡而縣額不改復隸靈州縣有鹽池三所隋廢

溫泉山 貂泉 黃河水經注云河西溢於窳

渾縣漢書衛青絕梓嶺梁北河謂此處也 蘭山

澤六鎮三戍按陸恭之風土記云正始三年尙書

原思禮侍郎韓貞撫巡蕃塞以沃野鎮居南與蘭

山澤六鎮不齊別置三戍 隋長城隋煬帝大業

中築在縣西北大河外 靈武城在縣東北隔河



一百里其城本蒙恬築 新堡在縣西北四十里  
永昌元年置堡內安置防禦軍二千五百人糧五  
萬石舊名千金堡

廢靈武縣西北十八里四鄉 本漢富平縣漢置渾懷都尉理

所水經注云河水又東北經渾懷鄣西是也後魏  
太和初平三齊後徙歷下人處于此遂有歷城之  
名後周因置歷城郡於此周天和三年廢郡為胡  
城鎮以統之至唐武德五年移舊靈武縣於此  
薄骨律渠經縣西南五十里 黃河自迴樂縣界  
流入 千金陂在縣北四十二里長五十里闊十

廢弘靜縣東北六十里三鄉 本漢富平縣地按隋圖經集云

弘靜縣本漢城居河外三里乃舊薄骨律鎮倉城  
也後魏立弘靜鎮徙關東漢人以充屯田隋立為  
縣至德元年改為保靜縣 賀蘭山在縣西九十  
三里山上多有白草遙望青白如駿馬北人呼駿  
馬為賀蘭鮮卑之類多依山谷為氏族今賀蘭姓  
者皆以此山名 典農城按水經注云河水又東  
過朔方郡弘靜縣典農城是此也

廢溫池縣東南一百八十里二鄉 本漢富平縣地亦為弘靜縣



地唐神龍元年置縣

廢鳴沙縣

西一百二十里三鄉

本漢富平縣地屬安定郡後周

保定二年於此置會州建德六年廢郡立鳴沙鎮  
隋文帝置環州以大河環曲爲名仍立鳴沙縣屬  
焉此地人馬行沙有聲異於餘沙故曰鳴沙大業  
三年罷環州以縣屬靈武唐貞觀六年復置環州  
九年州又廢縣歸靈州神龍中爲默啜所寇因而  
荒廢遂移縣于廢豐安城卽今縣理其舊縣基咸  
亨三年歸復因以其地置安樂州仍移吐谷渾部  
落自涼州徙于鄯州旣而不安其居又徙于靈州

之境置安樂州以處之是後復陷蕃中吐蕃常置  
兵以守之大中三年七月靈武節度使朱叔明奏  
收復安樂州八月勅安樂州爲威州仍領鳴沙縣  
今州與縣俱廢 長樂山按十道記云安樂州在  
靈武南稍東一百八十里近長樂山 下北山一  
名鐸落山以山下有鐸落泉水故以爲名舊吐谷  
渾部落所居 樹樓山空青山並在邑界 黃河  
西自會州烏蘭縣界流入 廢定遠縣在州東北  
二百里唐先天二年郭元振以西城遠闊豐安勢  
孤中閒千里無城烽堠杳眇故置此城募健兵五



千五百人以鎮之其後信安王禕更築羊馬城幅員一十四里經畧軍在夏州西北三百里天寶中王忠嗣奏于榆多勒城置軍今屬靈武節度西南去靈武六百餘里

今管鎮七

城下管蕃部三

傍家外生族巡檢司使移香一族

媚家族巡檢使保尾一族

越邦族巡檢使羅香一族

黃河南岸

清遠鎮管蕃部九

青天門一族

泥悉逋一族

羅泥一族

羅泥磨慶一族

噤埋一族

嚙窰移一族

封家一族

宗家一族

越邦一族

漢戶主客四十二

黃河北岸

昌化鎮管蕃部一

吐蕃村巡檢使委尾一族



漢戶主客四十二

保安鎮管蕃部一

傍家外生後巡檢使拓拔第一族

漢戶主客二百三十四

保靜鎮管蕃部六

吐蕃村巡檢使委尾一族

右廂巡檢使成悉逋等一族

右廂務下義征使羅慶等一族

右廂巡檢使務下義征楊尉尉等一族

狼峻村義征使埋慶等一族

鬼悉渦巡檢使廋子等一族

漢戶主客一百七十五

臨河鎮管蕃部三

小父兒義征使噶悉逋一族

鬼悉渦巡檢副使廋子一族

鬼悉渦巡檢使埋逋一族

漢戶主客六十七

懷遠鎮管蕃部六

羅悉逋族巡檢使八筵一族

羅悉逋族副巡檢使浪噶一族



小父兒族巡檢筮池音通一族

小父兒巡檢使嗟埋一族

小父兒巡檢使移通一族

小父兒巡檢使悉筮一族

漢戶主客二百二十三

定遠鎮管蕃部四

麴家族都指揮使麴守榮麴再遇等一務

筮浪族巡檢使西逋等一務

富兒族巡檢使越啜等一務

小阿父兒族巡檢使遇悉逋等一務

右自唐貞觀四年於迴樂縣界置迴環二州並屬靈武都督府十三年廢迴環二州二十年鐵勒歸附於州界置皋蘭高麗祁連三州並屬靈州永徽元年廢皋蘭等三州調露元年又置魯麗塞舍依契等六州總爲六胡州開元初廢復置東皋蘭州寄鳴沙縣界燕然雞鹿雞田三州寄迴樂縣界燕山燭龍二州寄溫池縣界竝是突厥九姓部落所處唐末並廢今但存七鎮而已



太平寰宇記卷之三十七

太平寰宇記卷之三十七終

太平寰宇記卷之三十七

關西道十三

會州廢

鹽州廢

夏州

通遠軍

保安軍

會州

會州

會寧郡今理會寧縣

禹貢雍州之域古西羌地秦屬隴西

漢昭帝分天水隴西張掖各三縣為金城安定二

郡此為枝陽縣地屬金城郡後漢屬金城武威二

郡後魏廢帝元年置會寧縣其地所屬不改西魏

因立會州尋廢至後周保定二年移於鳴沙省縣

宋本起



改置會寧縣爲鎮尋又廢鎮卻復縣以屬平涼郡  
唐武德二年平李軌置西會州貞觀八年以此州  
倉儲殷實改爲粟州其年又爲會州天寶元年改  
爲會寧郡乾元元年復爲會州

元領縣二

會寧 烏蘭

州境

東西五百一十里

南北三百三十里

四至八到

東南至東京二千四百七十里

東南至西京二千五十里

東至長安一千一百九十里

東至原州四百里

西至涼州六百里

南至蘭州四百二十里

北至靈州六百里

東南至原州三百九十里

西南至蘭州三百八十里

東北至靈州五百三十里

西北至涼州五百四十里



戶

開元戶三千五百四十蕃漢雜

風俗州同原

人物無

土產

鹿胎 野馬皮 覆鞍氊 鹿尾 靴 白角簞

駝褐已上為貢

會寧縣五本漢鶉陰縣地周太祖置會寧縣屬會州

隋大業二年改為涼川縣唐武德二年又改為會

寧 黃河自西南蘭州金城縣界流入水經云河

水又東北過天水勇士縣北是此處也 黃河堰

唐開元七年河流漸逼州城刺史安敬忠率團練

兵起作拔河水向西北流遂免滄沒 會寧關東

南去州一百八十里 河池其地生鹽西去州一

百二十里

烏蘭縣州西北驛路一百八十里直路一百四十里三鄉本漢祖厲縣地屬

安定郡後漢屬武威郡前涼張軌收其縣入涼州

別置祖厲縣周武帝西巡於此置烏蘭關又置縣

在會寧關西南四里後移東北七里平川置

鹽州



鹽州

五原郡今理五原縣

禹貢雍州之域春秋至戰國皆為戎

狄所居史記云梁山涇漆之北有義渠胸衍之戎謂此地也及秦始皇併天下以此地屬雍州今州即漢馬嶺縣地漢置五原郡地有原五所故為名故城在今榆林縣界尋廢後魏太武平赫連昌之後初置大興郡至西魏改為五原郡復立漢名尋改為西安州東有安州故此加西字廢帝三年以其地北有鹽池又有鹽州隋開皇中廢之大業中為鹽川郡唐武德元年改為鹽州領五原興寧二縣其年移州及縣寄理靈州四年省興寧入五原縣貞觀元年廢鹽州五原縣入靈州二年平梁師都復于舊城置鹽州及五原興寧二縣隸夏州都督府其年改屬靈州都督府天寶元年改為五原郡乾元元年復為鹽州永泰元年十一月升為都督府元和八年隸夏州

元領縣二

五原 白池

州境

東西二百四十八里 南北二百七十八里

四至八到



東南至東京二千四百三十里

東南至西京二千一十里

南至長安一千五百里

東至綏州六百八十里

南至慶州五百五十里

西至會州八百里

北至宥州一百四十里

東南至延州五百三十里

西南至原州七百里

西北至靈州三百里

東北至夏州三百里

戶

唐開元戶三千三十五

風俗

以牧養牛羊為業

人物無

土產

地居沙鹵無果木不植桑麻唯有鹽池百姓採漉以爲業

五原縣三今州南至慶州馬嶺縣北界即舊馬嶺縣



地貞觀二年縣與州同立以其地勢有五原舊有五原關因爲郡邑之稱 五原龍遊原乞地千原青嶺原音可嵐貞原橫槽原 鹽池四所烏池白池出鹽唐增收利其瓦窰池細嶺池並廢 五原鹽川按郡國志云胡人謂之霞沒城在郡邑內白池縣北九十里三鄉按其地舊爲蕃戎之地隋得之以其地有鹽遂以城之卽開皇九年置鹽池也唐貞觀二年改置興寧縣至景龍三年又改爲白池縣取鹽白池爲稱又水名白池烏池 井城葭蘆澤按郡國志云井城葭蘆澤在興寧縣亦鹽池之異稱

耳

### 夏州

夏州

朔方郡今朔方縣

禹貢雍州之域春秋及戰國時屬魏

秦併天下屬上郡漢分置朔方郡故武帝紀曰元朔二年遣將軍衛青李息出雲中至高闕遂西至符離收河南地置朔方五原郡按地理志朔方理三封屬并州部莽曰溝搜是也漢之三封縣在今長澤縣界有三封故城自漢至今常爲關中根柢西晉亦爲朔方郡後赫連勃勃據之僭稱大夏蒸沙以築其城號爲統萬按十六國春秋錄云鳳翔



元年春勃勃下書發嶺北夷夏十萬人於朔方之北黑水之南營起京城以一統天下臨萬國爲義故立此名其城土白而堅南有亢敵樓峻嶮非人力可攻迄今雉堞雖久崇墉若新至後魏始光四年爲太武所滅置統萬鎮季文太和十一年改置夏州西魏置宏化郡至隋開皇初復爲夏州煬帝初復爲朔方郡唐貞觀二年平梁師都改爲夏州都督府領夏綏銀三州其夏州領德靜巖綠寧朔長澤四縣其年改巖綠爲朔方縣七年於德靜縣置長州都督府八年改北開州爲化州十三年廢化州及長州以德靜長澤二縣來屬天寶元年改爲朔方郡乾元元年復爲夏州至五代陷蕃皇朝太平興國八年歸順今爲定難軍節度

元領縣四

今三

朔方 寧朔 德靜

一縣割出

長澤

州入宥

州境

東西二百一十五里 南北七十五里

四至八到



東南至東京一千四百八十里

東南至西京一千六十里

東南至長安一千五十五里

東至銀州二百里

南至延州三百八十三里

西至靈州五百五十里舊記云西至鹽州三百里

北至黃河八百里舊記云安北府八百里

東南至綏州四百里

西南至慶州五百九十一里

東北至勝州九百里

西北至豐州七百五十里

戶

唐開元戶九千二百

皇朝管漢戶二千九十六蕃戶一萬九千二百九

十

風俗

漢武攘卻戎狄開邊置郡多徙關中貧民或報怨犯法者以充物其中故習俗頗殊地廣人稀逐水草畜牧以兵馬爲務酒醴之會上下通焉

人物無



土產

角弓 瓊 酥 麻布 羊 馬 駝 芑霜藿

有乞物魚 葱味辛

朔方縣四本漢縣漢末廢後魏眞君六年更名巖綠

縣屬化政郡隋開皇三年廢化政郡以巖綠縣屬

夏州唐貞觀三年改爲朔方縣 統萬城水經注

赫連勃勃於無定河北黑水之南築此城勃勃書

云今都城已建宜立美名朕方統一天下君臨萬

國宜以統萬爲名其城土色白而牢固有亢敵樓

峻險非人力可攻酈道元云統萬城蒸土加功雉

堞雖久崇墉若新其城南門曰朝宋北門曰平朔

東門曰招魏西門曰服涼其子城在羅城東門曰

鳳陽本有三門夷人多尙東故東向開 眞珠樓

通天樓皆勃勃建在城內 契吳城在縣北一百

二十五里赫連昌因山所築隋置白城鎮後廢

什賁故城在縣理北卽漢朔方縣故城詩所謂王

命南仲城彼朔方是也漢武帝元朔二年收河南

地置朔方五原郡使校尉蘇建築朔方公孫弘數

諫以爲疲弊中國以奉無用之地願罷之上使朱

買臣難弘發十策弘不得一由是卒城之自漢至



今常爲關中根柢 黃河西自靈州懷遠縣界流入 契吳山在縣北七十里十六國春秋赫連勃勃北遊契吳而嘆曰美哉斯阜臨廣澤而帶清流吾行地多矣自馬嶺以北大河以南未有若斯之壯麗矣 雕山連互郡界 無定河一名朔方水亦曰奢延水源出縣南卽漢李陵失利於此河之外 烏水舊名黑水以周太祖諱名曰烏水源出縣北平地亦契吳之麓 濛水按水經注云朔方縣有濛水合金河而流是也 茄蘆水

寧朔縣

東南曰百二 十里二鄉

亦漢朔方縣地後周武帝於此

置寧朔縣屬化政郡隋開皇三年罷郡以縣改屬夏州唐武德六年於此立南夏州貞觀二年廢三交城按赫連勃勃夏錄云龍昇五年秋九月勃勃率眾來拒十一月戰于青石北原秦師敗績降其眾四萬獲戎馬二萬匹因築此城 賀蘭山在縣東北三十里 秦長城在縣界

德靜縣

東北一百 里二鄉

亦漢朔方地按其地在縣西北接

今朔方縣界有什賁故城是也後周建德二年於此置彌渾縣以縣南有彌渾水爲邑名又立六胡州在邑之北隋開皇三年改彌渾縣爲德靜鎮至



雲中都督府五字宋本作陰文

廢呼延州都督府七字宋本作陰文

廢桑乾都督府六字宋本作陰文

以下宋本缺

大業九年廢鎮立縣仍立朔方 無定河自朔方縣界流入 長城在縣西二里

廢雲中都督府党項部落寄在朔方縣界管小州五  
舍利州思璧州阿史那州綽部州白登州戶一千  
四百三十

廢呼延州都督府党項部落寄在朔方縣界管小州  
三賀魯州邾吉州蹀跌州戶一百五十五

廢桑乾都督府寄治朔方縣界管小州四郁射州藝  
失州畢失州叱畧州戶二百七十四

廢定襄都督府寄治寧朔縣界管小州四阿德州執  
失州蘇農州拔延州戶四百六十

廢達渾都督府延陁部落寄在寧朔縣界管小州五  
姑衍州步訖若州嶧彈州鶻州低粟州戶一百二  
十四

廢安化州都督府寄在朔方縣界戶四百八十三  
廢寧朔州都督府寄在朔方縣界戶三百七十四  
廢僕固州都督府寄在朔方縣界戶一百二十四  
已上八都督府唐朝所置今並廢

通遠軍

通遠軍本西蕃邊界靈州方渠鎮晉天福四年建為



威州仍割寧州木波馬嶺二鎮隸之至周廣順二年避諱改爲環州顯德四年以地理不廣人戶至簡降爲通遠軍管通遠一縣并木波石昌馬嶺等三鎮徵科人戶

領縣一

通遠

軍境

東西一十里

南北一百二十里

四至八到

東南至東京約二千里

東南至西京一千六百八十里

東至東原棱蕃部界三里

西至甜水堡蕃部界五里

南至木波鎮界四十里

北至靈武路烏崙塞三十里元無漢戶四面並是

蕃部

東南至蕃部獨家族一十五里

西南至蕃部挾利族一十五里

西北至蕃部傍家族一十五里

東北至蕃部鼻家族一十五里



戶

皇朝戶主二千七百二十一客二千二百三十五

風俗

蕃漢相雜

土產

生甘草 土山並無果木

通遠縣

無鄉以四鎮管人戶

與州同置在郭下

鹽河從土橋

歸德州同家谷三處發源來鹽苦不堪 甜河在

城西從蕃部鼻家族北界來供軍城人戶 古長

城在縣北一里秦長城也 古太州在軍西北二

里

保安軍

保安軍本延州之古栲栳城唐咸亨中曾駐泊禁軍

於此至貞元十四年建為神策軍尋改為永康鎮

屬延州扼截蕃賊至皇朝太平興國二年升為保

安軍管二鎮一十九寨

軍境

東西一百里

南北一百九十里

四至八到

東至東京一千七百一十里



東至西京一千三百五十里

東南至長安六百里

東至蕃部末懿族七里至延州金明縣界七十里

西至蕃部悉逋族一十里至慶州金湯鎮三十里

南至延州敷政縣界一百二十里至延州一百五

十里

東北至蕃部厥懿族一十里至宥州八十里

戶

皇朝戶主七百一十四客二百七十五

風俗

蕃漢戶相雜

土產

羊地寒霜早不宜五穀

吃莫河在軍北一十里源出蕃部吃莫川南流至軍

城四十六里入落一作洛河不勝船棧音伐聖人道

在軍城東七里從蕃部末懿家族來經軍界一百

五里入敷政縣界即赫連勃勃起自夏臺入長安

時平山谷開此道士人呼為聖人道

校勘

會州總序



此爲枝陽縣地屬金城郡後漢屬金城武威二郡

按枝陽縣兩漢皆屬金城郡今云後漢屬金城武威二郡疑有脫誤

後魏廢帝元年置會寧縣其地所屬不改

按晉書地理志前涼張實分金城之令居枝陽二縣又立永登縣合三縣立廣武郡而元和郡縣志謂廣武郡張駿三年立未知據何書自後割據非一至後魏廢帝時不知屬何郡而今記云所屬不改必有脫

誤

後魏廢帝元年置會寧縣其地所屬不改西魏因立會州

按元和郡縣志會州序載周太祖爲西魏相來巡會師于此因置會州縣序又云周太祖所置隋書地理志會寧縣注但言西魏置會州開皇十六年置縣而不及會寧舊爲何縣今記又云後魏廢帝置會寧縣而西魏因立會州諸書皆不一未知孰是然元和志爲詳



太平寰宇記卷之三十七終

太平寰宇記卷之三十八

關西道十四

綏州

銀州

振武軍廢

麟州

勝州廢

府州

綏州

綏州

上郡今理龍泉縣

禹貢雍州之域春秋白翟所居七國

時屬魏秦為上郡蒙恬將兵于此公子扶蘇所監

之處是也在漢為雕陰縣地高帝元年項羽立董

翳為翟王七月廢復為上郡武帝徵六郡良家子

上郡即其一也後漢末荒廢年久俗是稽胡及赫



連勃勃部落所居後魏明帝於此置上郡廢帝元年于郡內分置綏州今綏延等州竝爲右部都尉理隋開皇初郡廢而州如故煬帝初改綏州爲上州尋廢州置雕陰郡以郡西南有雕陰山復漢縣名唐武德三年遂于延州豐林縣置綏州總管府管西和南平北基銀雲真上珍北吉匡龍等十一州其綏州領上大斌城平綏德延福五縣六年移治所于延川縣界七年又移治城平縣界魏所廢城平貞觀二年平梁師都罷府移州治上縣其城則據山四面甚險真邊陲之郡也天寶元年改爲差軍將徵科

元領縣五竝廢

龍泉 城平 綏德 延福 大斌

州境

東西一千里 南北三百里

四至八到

東南至東京一千七百四十里  
東南至西京一千三百二十五里



西南至長安一千里

東至石州界黃河一百三十里河上有孟門關東去石州九十五里

西南至延州三百四十里

北至夏州三百六十里

西北至銀州一百六十里

西至夏州四百里

東南至隰州石樓縣西北黃河為界一百五十里

東北至銀州一百四十里

戶

唐開元戶八千七百二十五

皇朝管主客戶二千八百八十五

風俗同夏州

土產

胡女布貢 蠟燭貢

廢龍泉縣四鄉本秦膚施縣二漢同後魏廢帝元年于

此置上縣取郡為名隋開皇三年上縣屬綏州唐

天寶元年改為龍泉縣以龍水為名至皇朝見管

蕃戶 長城一在州西一十五里大力川一在州

北二十五里無定河竝是蒙恬所築之遺跡 疏



屬山山海經云貳負之臣曰危危與貳負殺窳音

窳帝乃梏之疏屬山桎其右足反縛兩手與髮繫

之于山西北漢宣帝使人發上郡疏屬山于盤石

室中得一人徒裸被髮反縛械一足因問羣臣莫

能知唯劉向按山海經對宣帝驚異上始重學于

是時人競學山海之說 無定河一名奢延水北

自銀州撫寧縣界入境 州城唐貞觀元年築四

面石崖東面高八十尺西面高一百四十尺南面

高四十尺北面高一百二十尺周迴四千二百步

上郡古城在縣東南五十里始皇使扶蘇監蒙

恬處 吳兒城在縣西北四十里赫連勃勃破劉

裕子義真于長安遂虜其人築此城以居之 秦

扶蘇冢在無定河東去州八里 蒙恬冢在州西

大力川上去州二里

廢城平縣西南一百里二鄉本秦虜施縣地二漢不改後魏

神龜元年于今縣西三十里庫仁川置城中縣隋

諱中改爲城平縣仍自庫仁川移于今理今廢爲

城平鎮見差蕃人爲鎮將管蕃戶 吉魚山 阿

班山 清澗川水已上竝在縣界 保定嶺在縣

界蕃部族帳內



廢綏德縣

南一百里元二鄉

亦秦虜施縣地二漢不改魏省

上郡後魏大統十二年分上郡南界邛尼谷置綏

德縣唐武德二年移于吐延水北即今理今為綏

德鎮見差蕃人為鎮將管蕃戶 舊石城在縣東

三十里今寬州是也 僕射堡在縣界 骨悉箇

堡在縣界骨悉箇者是胡音 斜溪嶺在縣界蕃

部族帳內

廢延福縣

南一百一十里二鄉

亦虜施縣地後魏廢帝元年于

此置延陵縣屬撫寧郡隋開皇十七年改為延福

縣此縣城據崖三面負絕攻守頗為邊防險固之

所今廢為鎮差蕃人管蕃戶 青龍山 洛陽山

橫山 大和川水竝在縣界 吳兒城在縣南

四十里 彌溺堡彌溺者胡語此谷地寒因以為

名 同突箇堡在縣界胡語今澤葱是也堡多此

菜 聖佛崖 甬子山 定仙嶺竝在縣界 黃

河北自撫寧縣界流入 故匡州城隋置此州在

縣西北五十里故城尚存唐武德六年與六胡州

又同置祿山之亂陷入蕃界

廢大斌縣

西北一百一十里二鄉

亦虜施縣地後魏神龜元年

于今縣東五里置大斌縣屬上郡唐武德七年移



于今城平縣界魏城平故城以置之卽今縣也今廢爲大斌鎮差蕃人管蕃戶 柱天山 小力山 大力山 小力川竝在邑界

### 銀州

銀州 銀川郡領儒林縣

禹貢雍州之域春秋時爲翟地秦并

天下爲上郡漢爲西河郡 音銀 陰縣晉時戎翟所

居苻秦建元元年自驄馬城巡撫戎狄其城卽今

理是也周武保定二年于其城置銀防三年置銀

州因谷爲名舊有人牧驄馬于此谷虜語驄馬爲

乞銀隋大業二年廢銀州縣屬雕陰郡隋末陷于

賊唐貞觀二年平梁師都于此重置銀州天寶元年改爲銀川郡乾元元年復爲銀州

元領縣四

儒林 眞鄉 開光 撫寧

### 州境

東西二百七十一里 南北三百二十八里

四至八到

東南至東京一千八百二十里

東南至西京一千四百里

西南至長安一千一百六十里



東至石州界黃河一百六十里

南至綏州一百六十里

西至夏州二百里

北至勝州柘珍驛二百五十里

東南至綏州二百四十里

西至綏州三交土堠七十五里

西北至夏州二百三十里

東北至勝州二百六十里

東北至麟州三百里

戶

開元戶六千一百二十

風俗同夏州

土產

杏子 貢女稽布 賦麻布

儒林縣

舊四鄉

本漢囿陰縣地以其在囿水之陰故名

隋開皇三年置儒林縣屬銀州大業三年廢銀州

以縣屬雕陰郡唐貞觀二年重置銀州縣又屬焉

無定河自夏州界流入

真鄉縣

東北一百里舊四鄉

漢囿陰縣地後周保定二年于今

縣理置中鄉縣屬中鄉郡至隋開皇元年避中字



太平寰宇記卷之三十六  
改真鄉縣兼廢中鄉郡以縣割隸銀川郡 茄盧  
水源出縣西北平地

開光縣東北二百里舊三鄉漢園陰縣地周武帝于今理置開

光郡宣帝大象二年廢郡置開光縣屬撫寧郡隋

開皇三年罷郡以縣來屬大業中縣廢以其地入

真鄉縣唐貞觀二年平梁師都于此復立開光縣

撫寧縣東南八十里舊三鄉本漢園陰縣地後魏廢帝于今縣

東撫寧故城置撫寧縣屬撫寧郡隋開皇三年罷

郡以縣來屬 無定河在縣北二十里

廢靜邊州都督府舊治銀川郡界管小州十八

廢歸德州寄理銀州界處降党項羌

已上二州唐所置今竝廢

振武軍今廢

振武軍今理金河縣舊為單于大都護府即漢定襄郡之

成樂縣也在陰山之陽黃河之北後魏所都盛樂

縣是也歷周隋或沒入蕃唐武德四年平突厥于

此置雲中都護府麟德元年改單于大都護府初

阿史德請冊親王為可音克汗音寒德曰單于者天上

之天也上曰朕兒與卿為天上之天可乎德曰死

生足矣遂于此立單于大都護府以殷王為單于



大都護垂拱三年改為鎮守使聖祿元年改為安  
化都督開元七年以其地割隸東受降城八年又  
置單于大都護府後為鎮武軍節度兼神策軍長  
武城防秋兵馬使

領羈縻州八

金徽州 幽陵州 龜林州 雞田州

雞鹿州 赤野州 居延州 燕然州

右件州名皆武德已後降蕃部落所居

元領縣一

金河

四至八到

東至東京里數缺

南至西京一千七百里

西南至長安取太原府路一千九百三十里

南至朔州三百五十里

東南至河東界靜邊軍一百二十里

西南至東受降城一百二十里

北至黑沙磧口七百里

戶

自立軍無戶數



風俗

尚氣强悍漢書曰定襄雲中本戎狄之地其人鄙  
樸少禮文好射獵

土產

香有穀撥甘松 藥有麻黃 升麻 當歸 菴  
藷 柴胡 刺楸 遠志 白角簞

金河縣

四鄉

即漢成樂縣地唐武德四年于此立都督

府遂立此縣北有金河以為邑稱天寶四年于城

內置 陰山 榆多勒山 東神山 釜山 善

陽嶺在縣北一百四十里秦長城枕之漢書謂高

祖困于平城即善陽嶺也武德四年平突厥置雲

中都護府于此地 青冢在縣西北漢王昭君葬

于此其上草色常青故曰青冢 燕然按續漢書

郡國志云和帝永元三年車騎將軍竇憲出雞鹿

塞遂至燕然山是在縣北近磧 李陵臺壘石為

之在府北單于探騎多候于此 五合城 雲中

城 金河在縣西北 磨勒城水突厥名魚為磨

勒此水出魚倍美故以指名 濛水秋冬常有煖

氣濛然故以為名在縣東南 延釋伽水

麟州



麟州

新秦郡今理新秦縣

禹貢雍州之域漢武徙貧人于關以

西及充朔方以南新秦中蓋其地也周隋以降為

銀勝二州地唐開元十二年割勝州之銀城連谷

二邑置麟州竝縣至十四年又廢州以屬邑還隸

勝州天寶元年復置尋改為新秦郡乾元元年復

為麟州昇為振武麟勝等節度兼都護以勝為支

郡

元領縣三

新秦 連谷 銀城

州境

東西 缺

南北 缺

四至八到

東南至東京一千九百三十里

東南至西京一千五百一十里

西南至長安一千四百六十里

東至嵐州界黃河一百二十里河上有合水關

東至嵐州一百八十里

西南至銀州三百里

東北至勝州四百里

戶



唐開元不供戶長慶戶一千七百五十四  
皇朝管主客戶二千三百五十

風俗同振武

土產同振武

新秦縣舊三鄉初武帝徙貧人于關以西及朔方以南

謂之新秦唐天寶元年置以為縣取漢舊名

連谷縣北四十鄉本漢囿陰縣地屬西河郡隋文帝于

此置連谷鎮煬帝改為連谷戍大業十三年廢戍

唐貞觀八年置連谷縣屬勝州天寶元年割屬麟

州

銀城縣州南四十鄉本漢囿陰縣地後魏時置石城縣

至廢帝三年改屬歸真郡隸綏州後周保定二年

移縣于廢石龜鎮隋大業七年改為銀城縣以隸

勝州開元中自勝州割隸麟州 成宜漢地理志

成宜屬五原中部都尉理 西安陽 河陰 武

都 桐陽塞已上皆漢縣城後廢俱在銀州界漢

和帝永元元年車騎將軍竇憲出雞鹿塞度遼將

軍鄧鴻出桐陽塞南單于出滿夷谷遂至燕然山

造陽史記燕亦築長城自造陽至襄平造陽即

縣西北之塞名也 五原塞城漢書云光祿徐自



爲出五原塞數百里築城列障至盧朐山卽今縣  
正北所謂光祿塞是也後魏曾于此立石城縣後  
改焉晉太康地理志自北地郡北行九百里得五  
原塞又北九百里得造陽卽此

廢安北大都護府唐龍朔三年分豐勝二州界置瀚  
海都護府總章中改爲安北大都護府北至陰山  
七十里至回紇界七百里去洛陽二千九百里在  
黃河北戶二千六領縣一陰山天寶元年置其州  
與縣今竝廢

勝州廢

勝州

榆林郡今  
理榆林縣

禹貢雍州之域春秋爲戎狄地戰國

爲晉趙地漢書云趙分晉國而有雲中五原是也  
秦并天下爲雲中郡領雲中咸陽陶林楨陵犢和  
沙陵原陽沙南北與武泉陽壽等十一縣王莽改  
曰受降屬并州兩漢之時雲中郡在今州東北四  
十里榆林縣界雲中故城是也按史記趙武侯自  
五原河曲築長城東至陰山又于河西造大城其  
一隅崩不得就乃改卜陰山河曲禱焉晝見羣鴻  
徘徊終日不去夜見火光在其下武侯曰此爲城  
乎乃于其處築城今雲中古城是也漢末大亂匈

水經河水注作虞氏記  
此誤



奴侵邊其地遂空至晉末屬赫連氏後魏太武平  
赫連昌之後迄于周代往往置鎮不立郡縣隋文  
開皇三年置榆林戍七年又置榆林縣屬雲州二  
十年割雲州榆林富昌金河三縣置勝州大業五  
年以勝州爲榆林郡十年郡人郭子和以城入突  
厥唐武德四年郭子和歸國其地陷梁師都貞觀  
三年平師都五年仍于隋舊理置勝州時柴紹劉  
蘭等破滅匈奴奪其河南之地因置勝州天寶元  
年改爲榆林郡乾元元年復爲勝州  
元領縣二

榆林 河濱

州境

東西 缺

南北 缺

四至八到

西南至東京二千二百五十里

西南至西京一千八百三十里

西南至長安一千八百六十里

正東至黃河四十里去朔州四百二十里

南至麟州界一百二十里

西至安北府二百五十里



正北至黃河五里去東受降城八里去單于府一百二十里

東南至合河關五百里關去嵐州二百三十里

西南至夏州九百里

西北至黃河二十里

東北至黃河十里去雲州四百里

戶

唐開元戶四千九十五

風俗同振武

土產

鹿角

榆林縣二鄉本漢沙南縣地屬雲中郡漢末北虜侵擾

歷魏晉及周此地竝無縣邑隋開皇七年于此置

榆林縣以榆林關為名屬雲州二十年改屬勝州

拂雲堆在縣北一百七十里 紫河水東北自

朔州鄯陽西北一百七十里流入 金河泊在縣

東北二十里周迴十里上承紫河及濛水南流入

大河 楨陵城莽曰楨陸在縣西北地理志謂緣

胡山是也屬雲中 黃河西南自夏州朔方縣界

流入 大葭蘆水在縣西二百二十里 小葭蘆



水在縣西二百四十里其閒地甚良沃 平河水首受黃河隋文開之以通屯倉 雲中故城在縣東北四十里趙武靈王北破林胡樓煩所置秦因之 榆林關在縣東四十里東南臨河秦卻匈奴處隋置榆林關總管後陷賊唐貞觀十三年復置榆林關

河濱縣

南二百九十里三鄉

本漢沙南縣地屬雲中郡迄于魏

晉此地不立縣邑至後魏及周復爲銀城縣地隋時復爲榆林縣地貞觀三年于此置河濱縣東臨河岸因以爲名改雲州爲威州八年廢威州以縣

屬勝州 黃河在縣東一十五步闊不能半里不通船筏 河濱關在縣東北唐貞觀七年立 君子津水經注云河水于二縣之間有君子津昔漢桓帝十三年帝幸榆中東行代地洛陽大賈齋金貨隨帝後行夜迷失道困甚往投津長後死爲埋之其子尋求父喪發冢舉尸資囊一無所損其子悉以金與之津長不受事聞于帝帝曰君子也改其津爲君子之津

府州

府州

今理府谷縣

本河西蕃界府谷鎮土人折太山折嗣



倫代爲鎮將後唐莊宗天祐七年有河朔之地將興王業以代地諸部屢爲邊患于是升鎮爲府谷縣至八年麟州刺史折嗣倫男從阮召回紇歸國詔以府谷縣建府州以扼蕃界仍授從阮爲府州刺史尋以契丹與小蕃侵擾移州于畱得人堡卽今州理是也晉高祖起義以契丹有援立之恩賂以雲中河西之地盡去焉契丹欲盡徙河南之民以實遼東人心大擾從阮因保險拒之晉少主嗣位北絕虜好乃遣使詔從阮出師明年春從阮率兵深入連拔十餘砦漢祖建號晉陽引兵南下從

阮率眾歸之尋升府州爲永安軍析振武之勝州竝沿河五鎮以隸焉乾祐元年從阮舉族入覲朝廷命其子德辰爲府州團練使周顯德元年升府州爲節鎮復以永安軍爲軍額就拜折德辰爲節度使顯德二年夏州李彝興以土壤相接府州惡其與己竝爲蕃鎮乃扼塞道路阻絕使臣世宗因問宰臣何如宰臣以夏州地處邊徼朝廷向來常與優恤府州甚爲逼小近建節旄得之無利失之何害且宜撫諭彝興上曰折德辰三數年來竭盡心力禦捍劉崇如何一旦弃之度外且夏州雖產



羊馬博易資貨悉在中土倘與阻絕何能爲者乃命使賚詔書責其悖慢諭以安危彝興果俯伏聽命至皇朝因之

領縣一

府谷

州境

東西

缺

南北

缺

四至八到

東南至東京二千一百二十里  
東南至西京一千七百二十里

東過河至火山軍四十里

南過河至岢嵐軍一百四十里

西至麟州一百五十里

北至二十六府勒浪馬尾直蕩啜娘等蕃族四百  
八十里

東南過河至火山軍界桔棹塞四十里

西南至麟州界杓枝谷三十里

西北至沒兒雀悉命女女越都等蕃族三百五十  
里

東北至唐龍鎮一百五十里



戶

皇朝管主客漢戶五百七十

土產

羊馬

府谷縣一里一鄉本府谷鎮唐天祐七年升為縣

太平寰宇記卷之三十八終

太平寰宇記卷之三十九

關西道十五

宥州

豐州

天德軍廢

宥州

宥州

寧朔郡理長澤縣

即漢三封縣之地自後河曲靈夏原

等州有蕃胡部落後周武帝乃立六胡州以統之

唐貞觀已後漸得其地至永徽中又置魯契依塞

舍麗六州用華人為刺史以管之謂之六胡州開

元九年胡酋帥康待賓反朔方節度使王峻討戮

之遂廢六州至二十六年以六州之殘人置宥州



于夏州西南長澤縣之地以寬宥爲名及延恩懷德歸仁三縣領諸降戶天寶元年改爲寧朔郡至德二年改爲懷德郡都督府乾元元年復爲宥州常寄理于經略軍蓋以地形居中可以總統蕃部北以應接天德南援夏州寶應以後因循遂廢由是昆夷屢擾党項靡依蕃部之人撫懷莫及元和九年二月復于經略軍置宥州屬夏綏銀節度郭下置延恩縣十五年移治長澤縣爲吐蕃所破長慶四年夏州節度李祐復置唐末流離三縣復廢後立于長澤縣卽今理

領縣一

長澤

舊領三縣俱廢

延恩 懷德 歸仁

州境

東西一百一十里 南北一百三十里

四至八到

東南至東京二千四百一十里

東南至西京一千九百九十里

南至長安一千一百九十里



東至桃子堡三十里爲界

南至洪門鎮八十里爲界

西至五原郡鹽池一百八十里爲界

北至神堆澤五十里爲界以北屬夏州

東南至古長城六十里屬夏州界

西南至盤堆八十里

西北至黃堆八十里爲界以西北至故宥州一百

二十里爲界屬夏州

東北至市澤四十里爲界以東北夏州八十里

戶

唐十道錄云開元無戶長慶中戶七千五百九十

皇朝管漢戶二百

風俗同夏州

人物無

土產

青鹽 酥 駝 馬

長澤縣二鄉漢三封之地漢地理志三封屬朔方郡後

魏于此置長澤縣屬闡熙郡隋開皇中罷闡熙郡

以縣屬夏州元和十五年夏州節度使奏請立宥

州于此邑仍就便移隸宥州 三封故城漢縣廢



太平寰宇記 卷之三十九  
城在今縣界 百井戍在縣南八十里勃勃與禿  
髮熾檀戰處 胡洛鹽池在縣北五十里周迴三  
十里漢有鹽官 石窟泉在邑界 六胡州按後  
周書云武帝曾立六胡州于靈夏兩州界以按諸  
胡至隋又分魯契依等三州于馬嶺縣界置匡州  
亦以處胡人至唐永徽以前七州之名猶存洎開  
元中胡帥康待賓據六胡州反後破之至元和三  
年收復又置之尋又改置宥州復移于長澤縣矣  
慶延恩縣三鄉元和九年因立郡故建此邑額取延恩  
宥爲邑之稱

廢懷德縣

五鄉

廢歸仁縣

五鄉

以上二邑因元和中六郡析六胡州地  
以置以上三縣唐末廢

豐州

豐州

九原郡今理九原縣

禹貢雍州之域春秋戎狄之地戰國

屬趙秦併天下爲上郡之北境漢屬五原故城在  
今勝州榆林縣界是也後漢末羌胡擾亂城邑皆  
空永嘉之後屬赫連勃勃後魏平之至後周保定  
三年置永豐鎮隋開皇五年置豐州因舊鎮爲名  
故賀葛真城是其地領九原永豐安化三縣大業



太平寰宇記卷之三十九  
七年罷州以爲五原郡義寧元年太守張遜以郡歸順唐武德元年罷郡復爲豐州仍置總管府六年省因徙百姓于今慶州白馬縣此地遂空貞觀四年突厥降附又于此分靈州之境置豐州都督府不領縣唯領蕃戶十一年廢地入靈州二十三年又置豐州天寶元年改爲九原郡乾元元年復爲豐州

元領縣二

九原 永豐

州境

東西

缺

南北

缺

四至八到

東南至東京二千八百一十里

東南至西京二千三百九十里

南至長安一千八百里

東至安北都護府三百五十里

東南至夏州七百五十里

西南至靈州九百里

西至黃河一百三十五里

正北至黃河四十里



西北渡河至受降城八十里

東北至黃河八十里

戶

按韋述十道錄開元領縣蕃戶無定長慶蕃漢戶  
共一千七百三十九

風俗

地居磧鹵田疇每歲三易自漢魏以後多為羌胡  
所侵人俗隨水草以畜牧迫近戎狄唯以鞍馬騎  
射為事風聲氣習自古而然

人物無

土產

獸多羆羊野馬 禽多石雞鳧鴨 衣以駝毛褐

布 食以白麩印鹽 草有遏邏羅去聲 殷 盧牛

沙蓬 芡苺 狼針 尤宜畜牧

九原縣三鄉漢舊縣隋復置尋廢至永徽四年又置兼

立郡于此 郎君城 九原 白登漢高祖所困

處 高闕當在河之西也按史記趙武靈王築長

城自代傍陰山下至高闕今在陰山之西漢書謂

高闕塞 西河漢書云武帝元朔二年衛青渡西

河至高闕破匈奴是也按此河自靈武郡之西南



便北流千餘里過九原郡乃東流時帝都在秦故  
謂之西河卽此處也其河自豐州東流千里在京  
師直北漢書亦謂之北河乃西河也 桐陽漢書  
云竇憲出雞鹿塞鄧鴻出桐陽塞遂至燕然山卽  
此也 大同川舊赫連時立大同鎮于此川按郡  
國志云大同鎮今九原有前雞延城後雞連城是  
也 大磧絕塞 雞鹿塞 故安北都護府今中  
受降城是有橫塞軍朔方軍之號於此也

永豐縣一百里二鄉本漢臨戎舊地後漢末廢周武保定

三年于此置永豐鎮隋開皇三年于鎮置永豐縣

尋為蕃戎所陷唐武德六年得其地永徽元年復  
置

燕然都護府領七州唐貞觀中置蘭皋等七州同隸  
焉 形勢西臨黃河北望陰山 拂雲堆解在下

天德軍今廢

天德軍今理在中受降城權置軍于永清柵本安北都護唐貞觀二十

一年于西受降城東北四十里置燕然都護以瀚

海等六都督皋蘭等七州并隸焉龍朔三年移于

磧北回紇本部仍改名瀚海都護總章二年又改

安北都護尋移于甘州東北一十八里隋故大同



鎮城垂拱元年置大同鎮城其都護權移理刪丹  
縣西南一作西北九十九里西安城景龍二年又移理  
西受降城天寶八載張齊邱又于可敦城置橫塞  
軍十二載安思順奏廢橫塞軍請于大同川西築  
城置軍玄宗賜名曰天安軍十四載築城功畢移  
天安軍理焉乾元後改爲天德軍緣居人較少遂  
西南移四里權居永清柵其城則隋大同城之舊  
墟在牟邠山鉗耳觜之北

軍境

東西

缺

南北

缺

四至八到

東取寧遠鎮故落鹽池經夏州至長安一千八百  
里

東南至中受降城二百里

南至牟邠山鉗耳觜三十里

西渡河至豐州一百六十里

西至黃河五里

西至西受降城一百八十里

北至磧口三百里

西北至橫塞軍二百里



東受降城

東受降城本漢雲中郡地在榆林縣東北八里今屬振武節度

四至八到

南至長安一千八百六十二里

東南至洛京取單于路二千一百二十里

東南至朔州四百里

西南渡河至勝州八里

西至中受降城三百里

北至磧口七百里

中受降城

中受降城本秦九原郡地在榆林漢元朔二年更名五原唐開元十年又于此城置安北大都護府後又移徙事具天德軍 敬本古城在中城北四十里鄭虔軍錄曰時人以張仁愿河外築三城自古未有敬本城周一萬八百七十二步壕塹深峻亦古之堅守賈耽古今述曰以地理求之前代九原郡城也

四至八到

南至長安一千八百六十里



東南至洛京取單于路二千一百二十里

東至東受降城三百里

西北至天德軍二百里

南至靈州四百里

北至磧口五百里

### 西受降城

西受降城

今天德軍理于此城

在豐州西北八十里蓋漢臨河

縣故理處唐開元初爲河水所壞至開元十年總

管張說于故城東別置新城今城西南隅又爲河

水所壞

### 四至八到

東至長安一千八百八十里

東至洛京取單于路二千五百里

正東微南至天德軍一百八十里

東南渡河至豐州八十里

西南至定遠城七百里

東北至磧口三百里

磧口西北至回鶻衙帳一千五百里

右按天德軍與三受降城皆連貫不遠卽唐神龍

三年張仁愿所置初突厥入寇朔方軍總管沙吒



忠義爲賊所敗詔仁愿代之先是朔方軍北與突厥以河爲界河北岸有拂雲堆神祠突厥將入寇必先禱祀祈福牧馬料兵而後渡河時突厥默啜盡衆西擊突騎施娑葛仁愿奏請乘虛奪取漠南之地于河北築此三城號曰受降首尾相應絕其南寇之路太子少師唐休璟以爲兩漢以來皆北守黃河今于寇境築城恐勞人費功終爲賊所有仁愿固請不已中宗竟從之仁愿表留年滿鎮兵以助其功時咸陽兵二百餘人逃仁愿禽獲盡斬之軍中股栗六旬而三城俱就以拂雲祠爲中城與東西兩城相去各四百餘里于牛頭朝那山北置烽堠一千八百所自是突厥不得度山放牧朔方無復寇掠減鎮兵數萬人初三城不置壅門及卻敵戰具或問曰此邊城禦備之所不爲守備何也仁愿曰寇若至此當併力出戰回顧望城猶須斬之何用守備生其退恐之心其後常元楷爲總管始築壅門議貶之

太平寰宇記卷之三十九終



太平御覽卷之三十九

皇極經世一

皇極經世一

皇極經世一

皇極經世一

皇極經世一

皇極經世一

皇極經世一

皇極經世一

皇極經世一

皇極經世一

皇極經世一

皇極經世一

皇極經世一

皇極經世一


皇極經世一

皇極經世一

皇極經世一

皇極經世一

皇極經世一





卷之四